



## PAENITENTIARIA APOSTOLICA

Prot. N. 156/13/I

BEATISSIME PATER,

Antonius Angelus Algora Hernando, Episcopus Civitatis Regalensis, suas libenter faciens preces Parochi de Herencia Paroeciae, sub tit. Immaculatae Conceptionis B. Mariae Virg., intra eiusdem Dioeceseos fines exstantis, reverenter exponit paroeciale de Herencia templum die XXVII Octobris MDCCXIII sollemniter consecratum esse. Ad hunc faustum eventum digne commemorandum, a proximo die XXVII Octobris usque ad diem XXVI Octobris MMXIV, peculiare peragentur sacrae functiones, et alia spiritalia incepta, ita ut christifideles, qui illuc accursuri quamplurimi praevidentur, sacramentis Paenitentiae atque SS.mae Eucharistiae proprias reficiant animas, et sinceram accrescant devotionem erga Immaculatam Virginem Mariam, caelestem Patronam. Quo uberius obtineantur spiritalia hii fructus, Exc.mus Orator donum Indulgentiae ad instar Iubilaei pro peregrinis piisque visitantibus, a Sanctitate Tua fiducialiter implorat. Et Deus, etc.

Die XXIV Iunii MMXIII



PAENITENTIARIA APOSTOLICA, de Summi Pontificis mandato, *plenariam* libenter concedit *Indulgentiam*, suetis condicionibus (sacramentali Confessione, eucharistica Communionem et oratione ad mentem Summi Pontificis) rite adimpletis, a christifidelibus vere paenitentibus et contritis lucranda si, unito corde cum spiritalibus Fidei Anni finibus, Paroecialem Immaculatae Conceptionis Ecclesiam de Herencia in forma peregrinationis inviserint et iubilariis celebrationibus, ut in supplicibus litteris nuper porrectis, devote interfuerint vel saltem per congruum temporis spatium piis considerationibus vacaverint, concludendis Oratione Dominica, Symbolo Fidei invocationibusque B. Mariae Virginis.

Paroeciae fideles, senectute, morbo vel gravi alia causa impediti, pariter *plenariam* consequi valebunt *Indulgentiam*, si, concepta detestatione cuiusque peccati et intentione praestandi, ubi primum licuerit, tres consuetas condiciones, anniversariis functionibus se spiritaliter adiunxerint, precibus doloribusque suis, vel incommodis propriae vitae, misericordiae Deo per Mariam SS.mam oblati.

Paroeciae fideles, insuper, *partialem* consequi valebunt *Indulgentiam*, quoties, corde saltem contrito, operibus sive misericordiae, sive paenitentiae, sive evangelizationis a Parocho propositis et a Dioecesano Episcopo adprobatis, pie incubuerint.

Quo igitur accessus, ad divinam veniam per Ecclesiae claves consequendam, facilius pro pastoralis caritate evadat, haec Paenitentia enixe rogat ut sacerdotes opportunis facultatibus ad confessiones excipiendas praediti, in iubilari templo prompto et generoso animo, celebrationi Paenitentiae sese praebeant ac S. Communionem infirmis ministrent.

Praesenti totum per iubilarem annum valituro. Contrariis quibuslibet non obstantibus.

  
EMMANUEL S. R. E. Card. MONTEIRO DE CASTRO  
*Paenitentarius Major*  
  
CHRISTOPHORUS NYKIEL  
*Regens*





## PAENITENTIARIA APOSTOLICA

Prot. N. 157/13/I

### DECRETUM

PAENITENTIARIA APOSTOLICA, vi facultatum sibi specialissimo modo a Sanctissimo in Christo Patre et Domino Nostro, Domino Francisco Divina Providentia Papa tributarum, Excellentissimo ac Reverendissimo Patri Domino Antonio Angelo Algora Hernando, Episcopo Civitatis Regalensis, benigne concedit ut, in trecentesimo anniversario, ex quo paroeciale de Herencia templum, Immaculatae Conceptioni Beatae Mariae Virginis dicatum, die in fidelium utilitatem eligendo, post litatum eucharisticum Sacrificium, impertiat omnibus christifidelibus adstantibus, qui, animo omnino elongato ab affectu peccati, iisdem sacris interfuerint, *papalem Benedictionem cum adnexa plenaria Indulgentia*, suetis sub condicionibus (sacramentali Confessione, eucharistica Communionem et Oratione ad mentem Summi Pontificis) lucranda.

Christifideles qui *papalem Benedictionem* devote acceperint, etsi, rationabili circumstantia, sacris ritibus physice non adfuerint, dummodo ritus ipsos, dum peraguntur, ope instrumenti televisifici vel radiophonici propagatos pia mentis intentione secuti fuerint, *plenariam Indulgentiam*, ad normam iuris, consequi valebunt.

Contrariis quibuslibet non obstantibus.

Datum Romae, ex aedibus Paenitentiarie Apostolicae, die XXIV mensis Iunii, anno Dominicae Incarnationis MMXIII.



EMMANUEL S. R. E. Card. MONTEIRO DE CASTRO  
*Paenitentiaris Maior*



CHRISTOPHORUS NYKIEL  
*Regens*